



UPA 2015/91

Michael Rosing

17. marts 2015

**Siunnersuut uunga: Tuniniaanissamik nittarsaassisarneq aamma nalunaaqutsersuisarneq pillugu Inatsisartut inatsisaat nr. xx, xx 2015-imeersoq. (tuniniaanissamik nittarsaassisarnermut inatsit)**

(Inuussutissarsiornermut, Suliffeqarnermut, Niuernermit Nunanullu Allanut Naalakkersuisoq)  
(Siullermeenera)

Demokraatini tunngaviusumik nuannaarutigaarput tuniniaanissamik nittarsaassisarneq nalunaaqutsersuisarnerlu pillugit inatsisissatut siunnersuut. Inatsisip siunertaatut eqikkarneqarsinnaavoq niuertut pissuserissaaqquneqartut. Nuannaarutigaarput meeqqat inuusuttullu illersorneqarnissaat inatsimmut ilanngunneqarsimammat aamma nuannaarutigaarput inatsisip ilusilersorneqarnerani ullutsinni attaveqariaatsit nutaaliat ilanngunneqarsimammata.

Siunnersuut arlaleriarluni saqqummiunneqartarnikuuvoq tamatigullu Demokraatini § 8, oqaatsinut tunngasoq sakkortuumik isornartorsiortarsimavarput.

Siusinnerusukku § 8 ima iluseqaraluarpoq, inatsisitigut piumasaqaataalluni tuniniaanissamik nittarsaassineq kalaallisut ingerlanneqartassasoq. Partiitut liberaliusutut akerleraarput naalakkersuisut aamma/imaluunniit inatsisartut suliffiit namminersortut qanoq iluanaarniarnissaannut akuleruttarnissaat aamma taakku tunisassiaminnik qanoq tuniniaanerminni nittarsaassisarnissaannut.

Tamatumunnga atatillugu eqqaamassallugu pingaaruteqarpoq taamaallaat pilerisaarisooqartarmat inuit pisiniassammata. Taamaattumik inuussutissarsiortut soqutigisaraat iluanaaruteqarnerujumallutik nittarsaasarnissartik.

Assersuutigalugu angallammik attartortitsisarfeerannguaateqarpunga. Pisisartukka tamarmik maanimituupput danskiunngikkunik nunat allamiut. Uannut isumaqanngilaq kalaallisut



pilersaaruteqartarnissara aamma nammineq kusanartumilluunniit allakkaluaruma.

Niuertarfiutinnut imminut akilersinnaaqqatuttumut immikkut aningaasartuutaaginnartussaavoq. Niuertarfiuteqartuuguma kalaallisut pilersaaruteqartarnikkut iluanaaruteqarfigisinnaasannik, soorunami taamaaliukuttuussaanga. Kisianni uanga kisima tamanna aalajangingassaraara qanoq iliorlunga pisisussarsiussanerlunga. Naalakkersuisut tamanna akuleruffigisussaannngilaat. Aamma taamaappoq niuertut allat eqqarsaatigalugit, uanga kisimaanngitsoq.

Tamanna tunngavigalugu Demokraatini iluarisimaarluinnarparput inatsisissatut siunnersuummi § 8 allangortinneqarsimammatt malunnarluartumik siusinnerusukku saqqummiunneqarneranut naleqqiullugu. § 8-mi manna oqaatigineqarpoq:

*”Allaganngorlugu ussassaarineq, allagartalersuineq aamma inini tamanit orninneqarsinnaasuni tuniniaanissamik nittarsaassineq sapinngisaq tamaat kalaallisut pissaaq. Tuniniaanissamik nittarsaassineq oqaatsit allat atorlugit pisinnaavoq.”*

Taamaattumik suliffeqarfiit namminneq qanoq pilersaarinnissartik nammineq aalajangersinnaajuassavaat aamma tamanna pissusissamisuuuginnarpoq.

Taamatut oqaaseqarluta inatsisissatut siunnersuut ilalerparput inassutigalugu Inuussutissarsiornermut Ataatsimiititaliami suliarineqassasoq.